

DIOSI
SONBAN TENCA
SUHUAMIN JOE

DIOSI
SONBAN TENCA
SUHUAMIN JOE

Selecciones de las Sagradas Escrituras
en el idioma colorado

© 1968, Wycliffe Bible Translators, Inc.

DIOSICHI PILABI CHANTIE:

Miya Jesucristo puyato mansonhinue. Diosichi
Tenca sonban joto yaca mansoncarinue.
Junto miinchan joe ya Diosichi Nao joeque.

* * * * *

Jesucristo cambiaitumin. Matunan jun channan
jominue. Amana jun channan joe. Numatotiya
jun channan joto polechunae.

* * * * *

Jesucristochi fiquica merátutori ¿niyaito
yaca tennanchan jun?

(Rom. 1:4, Heb. 13:8, Rom. 10:17)

DIOSI CHANQUE MANTANUE:

Sona. Nuchi unilabe mantaino joe. Miya
 Diosi chanque "sen joe" tie. Unila. Nuchi
 sonaca laquirano joe. Yaca paituna. Nalala.
 Apala panunca meránola joe. Junni Diosi
 nulaca "sen jolajoe" tichunae. Apala.
 Nalalaca polencari paitulajona. Chanquenari
 comana tenca ilaichunae.

* * * * *

Nalalaca seque micaride. Niyaque nenano
 jonunca micaride. Junni huaito jun
 chanquenan nenalarachunae.

(Col. 3:18-21, Prov. 22:6)

DIOSI CHANQUE PILA CHUTESA CARINUE:

Diosi mantacaca miito tenca canayoe.
 Junni jucha queno itoyoe Diosi "jucha joe"
 tinunca.

* * * * *

Diosichi fiqui foco cuhuenta joe. Yaca miito
 Diosichi minuca nenano joyoe cheno tan
 chachi cuhuenta.

* * * * *

Diosichi fiquica merátori michi itoe.
 Meráto junto mantainchan joe. Mantaitutori
 palaque tenca calaquenae.

* * * * *

Miya Diosibe cayaide nuca mantasa. Yaca
 tennana. Tennato meránari se patarichunae.

(Sal. 119:11, Sal. 119:105, San. 1:22, Sal. 37:5)

DIOSI CHANQUE CUENTA QUENUE:

Casale nulachi tencabi nemen jominue jucha pun. Chan jominca Miya Jesucristo jera chen suhuanue. Nulachi tencabi jera chen suhuanue. Junni chente nenamin joto seque nenano jolajoe.

* * * * *

Seitonlaca huepanatuna. Yala canunca munaito quiratuna. Lapa cuhuenta sihuujailaichunae. Jayaca tape cuhuenta moora yucapiyalaichunae

(Efes. 5:8, Sal. 37:1-2)

DIOSICHI PILABI CHANTIE:

Jesúbe penenaminla Diosibe rocaínchan joe
peleituto.

* * * * *

Jesúbe titiya quesá rocaínide. Yachi
mantate rocaínari "chanqueanae" tie.

* * * * *

(Diosi chantimantie:) Meralaquede. Lasiri
Miya joyoe. Jeralelaca cuidaimin Diosi joyoe.
Jera queno podeiyoe.

* * * * *

(Diosichi chachi manca chantimantie:) Lachi
tencabi juchaca "sen joe" tinari, la
rocaínunca Diosi merátuchunae.

(Lucas 18:1, Juan 14:14, Jer. 32:27, Sal. 66:18)

JESUCRISTO CHANTINUE:

Ticatiya munaranunca itotori huepanatulajona.
 O anoca o pica o panuca "¿tile canchan jun?"
 titunchan joe. Uyenla junca huepana cachi
 timinlae. Nula chantitulajona. Apa Diosi
 jamochi chuto nulaca cuidainae. Jera
 munaranunca mirae. Junni Diosibe penena-
 chun tenfelaina. Diosichi mantate seque
 nenachun tenfelaina. Chanque tenca nenanari
 jera munaranuncanan Diosi cuhuaniquechunae.

(Mat. 6:31)

DIOSI CHANQUE MANTANUE:

Diosichi Tencabe penenamin jotori chanque
 nenachunae: Laquirachunae. Pansi jochunae.
 Huepanato nenatuchunae. Uyenla pasuhuanari
 páituchunae. Sen jochunae. Isapun itochunae.
 Tenca iton tala nenatuchunae. Cha pachunae.
 Jamimin pachunae.

* * * * *

Numasitotiya Miya Jesucristochi mantate
 nenalarana.

* * * * *

Huinan itori jelenquira nenachunae. Junni
 huinan ituto Diosichi Tencabe jera mantaito
 nenalarana.

(Gal. 5:22-23, Col. 3:17, Efes. 5:18)

DIOSI CHANQUE PILA CHUTESA CARINUE:

(Jesucristo chantimantie:) Diosichi Tenca nulachica patáto jera micarichunae. Lachi tenchi nulaca ayudaito payimin jochunae. La panunca jera mantenhisa carichunae.

* * * * *

(Jesucristo chantimantie:) Nula laca cuenta polarito nenano jolajoe. Diosichi Tenca nulachica patáto sonban tenca josa carichunae. Junni telele tote laca cuenta polarito nenanola joe.

(Juan 14:26, Hechos 1:8)

DIOSI CHANQUE CUENTA QUENUE:

Nula páimin jominlanue. Seiton pamin jominlanue. Pacaamin jominlanue. Seiton quemín jominlanue. Junni amana chanquenola itoe. Seque nenanchan joe. Laquiranchan joe. Jesucrístochi jolajoe. Jun tenchi Diosi nulaca perdonainue. Junni nulanán uyenlaca jun chanque perdonailaina.

* * * * *

Uyenla seiton quenari nula beconan seiton quetulajona. Miya Diosi yachi pilabi chantie: "Lasiri beconan yucapiyarimin joyoe" tie. "Lasiri casticaquemín joyoe" tie. Junni telaquenilaquede Diosi casticaquesa.

(Efes. 4:31-32, Rom. 12:19)

DIOSICHI PILABI CHANTINUE:

Miya Jesucristo jamochi nechi patachunae.
 Casale yabe penenamin jomin puyacala
 mansönhilaichunae. Junte nechi casonaminla
 lolaichunae. Puyaca jominlabe pelolaichunae
 poyobi. Junbi Miya Jesucristobe tulaito
 numatotiya yabe chuto poleno jolajoyoe.

* * * * *

Tarinpunla quepen numasi jano jonunca mo
 nantiya miitoe. Junni Miya Jesucristo
 manpatano ma jun channan joe. Numasi
 manpatano jonunca mo nantiya miitoe.

(1 Tes. 4:16-17, 1 Tes. 5:2)

DIOSI CHANQUE MANTANUE:

(Jesucristo chantimantie:) Nulaca laquirayoe.
 Junni nula tala jun chanquenán beco beco
 laquirano jolajoe. La chanque mantayoe.

* * * * *

(Jesucristo chantimantie:) Laca laquiratori
 la mantacaca meralaquechúnae.

* * * * *

"Jesucristobe penenamin joyoe" titori
 Jesucristo cuhuentanan nenanchan joe.

* * * * *

Seiton fiqica patulajona. Tencabe pato sen
 fiqicasiri palaquena meráminla seque tenca
 calaquesa.

(Juan 15:12, Juan 14:15, 1 Juan 2:6, Efes. 4:29)

SAN PABLO CHANTINUE DIOSICHI PILABI:

Jeralela jucha quemínlayoe. Diosi "chanque seque nenalarade" tinasanan mo nantiya chanque seque nenamin itolajoyoe.

* * * * *

Diosi nulaca laquichi juchaca piyarinue.
 Jesucristoca tennanun tenchi juchaca piyarinue
 Junni tenca manta Diosica tennatulajoe.
 Diosi nulaca laquirato tennasa carinue. Tenca
 manta seque nenatotiya tencachique juchaca
 piyarino podeituchunae. Jun tenchi "uyenlaca
 fe sen joyoe" titunchan joe.

(Rom. 3:23, Efes. 2:8-9)

DIOSI CHANQUE PILA CHUTESA CARINUE:

Diosi nuca "purano itoyoe" tie. "Numanan telaquepono itoyoe" tie. Junni calaca cachique polencari tenfetuna. Nisi tatotiya son jona.

* * * * *

Mo nantiya paluca patronlabe mantaino podeitue. Mancaca "seitoe" tito uyenca "sen joe" tichunae. O mancaca meráto uyenca merátuchunae. Jun chanquenán Diosica tenca catori calaca huepanano itoe. Calaca huepananaminnan Diosica tennano podeituchunae.

(Heb. 13:5, Mat. 6:24)

DIOSICHI PILABI CHANTIE:

Diosi cha panun pilaca sele miide. Palaituto miitori lurano itochunae. Chanque nenano tenfede Diosi nuca "sen chachi joe" tisa.

* * * * *

Ti nantiya queno jonunca miitoto Diosibe rocaide. Tenca cuhuasa rocaide. Diosi isapun itoe. Lucaritoto jeralelachi cuhuamin joe. Junni nuchinan tenca cuhuachunae.

(2 Tim. 2:15, San. 1:5)

DIOSI CHANQUE PILA CHUTESA CARINUE:

Sona cano sen joe. Unila queno sen joe.
Junca "jucha joe" titunchan joe. Junni
casalaitobi leyan tatunchan joe. Leyan
tanari o mancari jun tala leyan tanari
Diosi casticaquechunae.

* * * * *

Jucha tencaca telaquepocalae. Jucha quenoca
telaquepocalae. Jun tenchi nula tala nene
patulajona.

(Heb. 13:4, Col. 3:9)

DIOSI CHANQUE CUENTA QUENUE.

Jesucristo chantie: "Huepanatulajona. Apa Diosi laca erecae. Yachi mantate nenasa ticae. Junni nulaca jun chanquen an erenayoe la..

* * * * *

Chachila nulabe pansile Jesucristoca panhato merálaquechunae. "¿Ti quechun Jesucristobe cayaiyun? tichunae. Junni ¿chantiminlabe niyen tino jun? Ama tuca tenca cano joe. Páino itoe. Lurano itoe. Jelerato cuenta queniqueno joe Jesucristoca.

(Juan 20:21, 1 Ped. 3:15)

DIOSICHI PILABI CHANTIE:

Diosi jera se patarimin joe. Yachi
 chachilachi tenchi se patarimin joe. Ama
 Diosica munaiminla yachi chachila jolajoe.
 Diosi yalaca jasa carinue yachi jolajosa.
 Tenca muna chanquene. Junca miralarayoe.

* * * * *

Chiquelachi Diosi duque tae. Jesucristochi
 chachilachi tenchi duque tae. Characari senca
 tae. Junni nula ticatiya munaranunca Diosi
 cuhuachunae.

(Rom. 8:28, Fil. 4:19)

DIOSI CHANQUE MANTANUE:

Miya Diosicasiri tenca cano joe. Tencachique tenca catuna. Titiya quechinato Diosica tenca cato quenchan joe. Chanquenari Diosi seque tenca cuhuachunae ti queno jonunca.

* * * * *

Chiquelachi tenca duque encanaimin joe.
 Tenca chansi ti nantiya encanaitumin joe.
 Duque seiton joe. ¿Tencachique tencaca mo miino podeichun?

(Prov. 3:5-6, Jer. 17:9)

JESUCRISTO CHANTINUE:

Matu tote chanlatie: "Quiranunlaca laquirana" latie. "Páiminlaca pa jona" latie. Junni Jesucristo casan tala mantaquechinayoe tie. Nulaca páiminlaca laquiralarana. Nulaca yucaqueminlachi tenchi Diosibe rocailaina. Yalaca laquirasa rocailaina. Pa jominlaca se quelaquena. Nulaca seiton queminlachi tenchi Diosibe rocailaina. Diosichi chachila jominca nulaca seiton quenari yalachi tenchinan Diosibe rocailaina. Jesucristo chantie.

(Mat. 5:43-44)

SAN PABLO CHANTINUE DIOSICHI PILABI:

Jesucristochi chachila tala man parejori tenca cano jolajoe. Man parejori laquirano jolajoe. Man parejori tennato nenano jolajoe. Ama nula chanque nenanari la chara pansi joanae. Junni man tala man tala tenca catunchan joe. Isapun itolajona. "Uyenlaca fe sen joyoe" titulajona. Uyenla nuca fe sen joeque tenca calaquena. Jesucristo chanque tenca camin jominue. Junni nulanan jun chanque tenca calaquena.

(Fil. 2:2, 3, 5)

DIOSICHI PILABI CHANTIE:

Nuchi silon Diosichi Tencachi ya joe. Diosi yachi Tencaca erenue. Junni yachi Tenca jato nuchi silonbi chue. Junni nu tencachique silonca chacumi itoe. Diosi nuca osito cato ya chacumi ie. Nuchi tenca Diosichi joe. Junni "Diosichi joe" tito nuchi tencabi sen jono joe. Nuchi silonnan Diosichi joe. Junni "Diosichi joe" tito nuchi silonca se queno joe.

(1Cor. 6:19-20)

SAN JUAN CHANTINUE DIOSICHI PILABI:

"Jucha itoyoe" titunchan joe. Chantitori cha panunca miioto palaque tenca calaquenayoe. Ama chiquelachi juchaca Jesucristobe jera panola joyoe. Yabe jera panari junni jera piyarichunae. Jesucristo seque quemin joe. Nene patumin joe. Chiquelachi tencaca jera chalechunae.

* * * * *

Nula jucha quetusa in pila quenayoe. Chan josanan jucha quetori abocado talarayoe. Chara sen joe. Jesucristo chiquelachi abocado joe Diosichi cale.

(1 Juan 1:8-9, 1 Juan 2:1)

DIOSI CHANQUE PILA CHUTESA CARINUE:

Jesucristobe cayaiminla casan ica jolajoe.
 Matu tenca canunca jera pansica jolajoyoe.
 Casan tenca ica jolajoyoe.

* * * * *

Jesucristochi chachilaca laquiralarayoe.
 Junbe miralarayoe Diosichi minuca
 nenayoeque. Puyano jonun minuca purato
 sonano jonun minuca nenalarayoe.
 Laquiratuminla puyano jonun minuca
 cajilinae.

* * * * *

Jesucristo lachi tencaca sonbasuhuamin joe.
 Chanquenasa ticatiya queno podeiyoe.

(2 Cor. 5:17, 1 Juan 3:14, Fil. 4:13)

SAN PEDRO CHANTINUE DIOSICHI PILABI:

Nula casale Diosichi chachila itominlanue.
 Uyenlabe duque seiton nenaminlanue. Amana
 nula chanquetuminlae. Jun tenchi uyenla
 nulabe lutito huepanalainae. Huepanato
 nulaca pasuhuato seiton paminlae. Junni
 tennatulajona. Diosi yalaca miichunae.
 Manca mate yala Diosibe jera cuenta
 quelaquechunae. Ti queyoeque Diosibe jera
 cuenta quelaquechunae. Diosi jeralalaca
 chanque miichunae. Yucapiyarino jonunca
 o yucapiyarino itonunca miichunae.
 Casonanari o numa puyaca jonari miichunae.

(1 Ped. 4:3-5)

DIOSICHI PILABI CHANTINUE:

Jesucristochi chachila layaiminla jolajoyoe.
 Junni manca manca Jesucristochi jotonan
 layaituchi timinlae. Ama nula chan itolajona.
 Layaito beco beco seque cuenta quelaquena.
 Chanque sonba tenca ilaichunae. Jesucristo
 manpatano ma quello inae. Junca tenhito fe
 duque chanquelaquena.

* * * * *

(Jesucristobe penenamin chachi manca
 chantimantie:) Nulanan chiquelachi tenchi
 Diosibe rocaiola joe.

* * * * *

Diosibe rocaito nulachi tenchinan
 perocaimanyoe.

(Heb. 10:25, 2 Cor. 1:11, Rom. 1:9)

DIOSI CHANQUE PILA CHUTESA CARINUE:

Palaque tenca catulajona. Ticatiya huaquetori yacanan mancalaquechunae. Juchaca huaquetori juchachi yacapiyalaichunae. Diosichi Tencabe huaquetori junni Diosibe numatotiya sonato polelaichunae. Diosica encanaino podeitulajoe.

* * * * *

Diosi jeralalaca chansi laquirae: Yachi mancari naoca erecae. Junni yachi naoca tennamin chachila yucanchibi puyano itolajochunae. Numatotiya Diosibe sonato polelaichunae.

(Gal. 6:7-8, Juan 3:16)

SAN PABLO CHANTINUE DIOSICHI PILABI:

Yucan nulacasiri pasuhuatumin joe.
 Piyanlelaca pasuhuamin. Piyanlelaca jucha
 quesa carichi timin joe. Junnasa Diosi
 nulaca telaquepotuchunae. Nula chansiri
 huantaino podeinari junni yucan nantari
 pasuhuatuchunae. Diosi yaca olechunae.
 Junni yucan pasuhuanasa Diosi nulaca
 ayudaichunae. Niyaito se lono jonunca
 micarichunae. Junni yucan pasuhuanunca
 huantaino podeilaichunae nula.

(1 Cor. 10:13)

DIOSICHI PILABI CHANTINUE:

Numasitiya jeleratori Diosica tenca camanyoe.
Yabe penenato yachi fiquica seque tenca
canayoe. Diosica tennato chachilaca
jeleratiyoe.

* * * * *

Miya Jesucristo nulaca telaquepotuchunae.
Sonban tenca suhuachunae. Nulaca isaichunae
yucan nulaca fe lotusa.

* * * * *

Diosi nulaca sen isa carinae. Junni inca
mirayoe. Peleituchunae. Jesucristo
manpatano fecári nulaca sen ísa
cariniquechunae.

(Sal. 56:3-4, 2 Tes. 3:3, Fil. 1:6)

DIOSI CHANQUE PILA CHUTESA CARINUE:

(Jesucristo chantimantie:) Nulachi tenca huepanalaituna. Diosica tennato lacanan tennalarana. Lachi Apa Diosichibi duque chuno ya joe. Cha joe. Nene patumanyoe. Ama jun yaca sequebi jino joyoe tie. Junni nulanán junbi chularachunae. Yaca sequebi jito junto manpatano joyoe tie. Nulaca mancábi manpatano joyoe. Junni nulanán labe chularachunae.

(Juan 14:1-3)

DIOSICHI PILABI CHANTINUE:

Tarinpunla, huinan iminla, seiton paminla,
 encanaito tariminla, uyenlachica munaito
 quiraminla Diosichibi huitulajochunae.

* * * * *

Jesucristochi chachila. Hueyenla pansile
 jucha quenilaquechunae nula. Channan uyenla
 Diosichi Tenca talarato jucha quemınca
 payinola joe yape jucha manquetusa. Ama
 jamiminca panchan joe. "Fe sen joyoe"
 titunchan joe. Tencabe nenanchan joe. Tenca
 cato nenatutori nunan pansile jucha quechunae.

(1 Cor. 6:10, Gal. 6:1)

DIOSI CHANQUE PILA CHUTESA CARINUE:

Diosichi pilabi nulaca "naola" tie. Chantito nulaca payinue. ¿Jun fiquica pansicalayun? Miya Diosi chantimantie: Nuca casticaquenasa paituna. Nuca payinari jele ituna. Nuca laquirato junto payimin joyoe. Nuca "nao" titori junto casticaqueno joyoe.

(Heb. 12:5-6)

INDICE

Diosichi hua pilabi tile chuteca jonun:	In pilabi tile chuteca jonun:
Salmos 37:1-2	4
Salmos 37:5	3
Salmos 56:3-4	28
Salmos 66:18	5
Salmos 119:11	3
Salmos 119:105	3
Proverbios 3:5-6	18
Proverbios 22:6	2
Jeremías 17:9	18
Jeremías 32:27	5
Mateo 5:43-44	19
Mateo 6:24	13
Mateo 6:31	6
Lucas 18:1	5
Juan 3:16	26
Juan 14:1-3	29
Juan 14:14	5
Juan 14:15	11
Juan 14:26	8
Juan 15:12	11
Juan 20:21	16
Hechos 1:8	8
Romanos 1:4	1
Romanos 1:9	25
Romanos 3:23	12
Romanos 8:28	17
Romanos 10:17	1
Romanos 12:19	9
I Corintios 6:10	30
I Corintios 6:19-20	21

1 Corintios 10:13	27
2 Corintios 1:11	25
2 Corintios 5:17	23
Gálatas 5:22-23	7
Gálatas 6:1	30
Gálatas 6:7-8	26
Efesios 2:8-9	12
Efesios 4:29	11
Efesios 4:31-32	9
Efesios 5:8	4
Efesios 5:18	7
Filipenses 1:6	28
Filipenses 2:2, 3, 5	20
Filipenses 4:13	23
Filipenses 4:19	17
Colosenses 3:9	15
Colosenses 3:17	7
Colosenses 3:18-21	2
I Tesalonicenses 4:16-17	10
I Tesalonicenses 5:2	10
2 Tesalonicenses 3:3	28
2 Timoteo 2:15	14
Hebreos 10:25	25
Hebreos 12:5-6	31
Hebreos 13:4	15
Hebreos 10:5	13
Hebreos 13:8	1
Santiago 1:5	14
Santiago 1:22	3
I Pedro 3:15	16
I Pedro 4:3-5	24
I Juan 1:8-9	22
I Juan 2:1	22
I Juan 2:6	11
I Juan 3:14	23